

Inatsisartut Siulittaasuata ilassinninnernut angalanernullu aningaasartuuteqartarneranut, akeqanngitsunik ajunngitsorsiaanut tunissutinillu pissarsisarneranut malittareqqusat.

Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaanni nr. 22-mi, ulloq 18. december 2003-meersumi § 19 naapertorlugu aalajangersarneqarpoq:

Kapitali 1
Illassinninneq

§ 1. Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaat naapertorlugu Inatsisartut Siulittaasuut Nunatta Karsiata akiligaanik ilassinninnermut aningaasartuuteqarsinnaatitaavoq.

§ 2. Illassinninnermut aningaasartuutit Inatsisartut Siulittaasuannit atorneqartut Namminersorlutik Oqartussat soqutigisaanni Inatsisartullu Inatsisartulluunniit Siulittaasoqarfiat sinnerlugu atorneqassapput.

Imm. 2. Illassinninnermut aningaasartuutinik atuinermi immikkut ittumik pissutissaqartoqassaaq.

Imm. 3. Illassinninnermut aningaasartuutit nerisitsinerusinnaapput tunissutaasinnaallutilluunniit.

Imm. 4. Illassinninnermut aningaasartuutinik atuinermi akitinnerpaatitsiniartoqartassaaq.

Aningaasartuut pissutaasumut naapertutissaaq, annertunerunani.

Imm. 5. Illassinninnermut aningaasartuutit tupanik pisinernut atorneqarsinnaanngillat.

§ 3. Neriniartarfimmi imaluunniit Hans Egedep Illuani, nammineq angerlarsimaffigisami allaniliunniit aaqqissuussisoqartillugu nerisassaqartitsilluni il.il. ilassinninnermut aningaasartuutinik atuinermi pisuni ataasiakkaani tamani allakkiorqartassaaq takutillugu aningaasartuutit Nunatta Karsianit akilerneqarnissaat Namminersorlutik Oqartussat sooq soqutigisarineraat. Ilanngullugu allakkiamut aningaasartuuteqarnermi siunerineqartoq allanneqassaaq aammalu inuit peqataasut ataasiakkaat imaluunniit eqimattakkutaat kikkuunerat nalunaarneqassalluni, tak. § 20, imm. 1. Allakkiaq Inatsisartut Siulittaasuannit atsiorneqassaaq aningaasartuutillu naatsorsuutini atugassat uppernarsaataannut ilanngullugu kakkiunneqassalluni. Inatsisartut Siulittaasuut aaqqissuussinermi nammineq peqataasimanggikkuni, Inatsisartut Siulittaasuut sinnerlugu peqataasimasup allakkiaq atsiussavaa.

Imm. 2. Imm. 1-imni taaneqartumi ilassinninnermi, peqataasumut ataatsimut aaqqissuussinermi ataatsimi aningaasartuutit 800 kr.-it qaangissanngilai, matumani aaqqissuussinermi pisortatigoortumik sinniisut Namminersorlutik Oqartussat avataaneersut, naalakkersuisutut, inatsisartut siulittaasuattut imaluunniit qaffasinnerusumik inissisimasut peqataanerat pineqanngippat.

Imm. 3. Nersornaammik tunniussinermut atatillugu immikkut qaaqqusanut ilasseqatigiissitsisoqarsinnaavoq aningaasatigut killiliussat tamarmiusut 10.000 kr.-it iluanni. Aningaasatigut killiliussat nerisitsinermut, sassaallinermut pisariaqarpallu aliikkusersuinermut ininillu attartornermut atorneqarsinnaapput. Nersornaaserneqartussap imaluunniit nersornaaserneqartussap apparisaata, inooqataata meeraasaluunniit il.il. angalanerinut aningaasartuutit matussuserneqarnissaannut tapiissuteqartoqarsinnaanngilaq. Tamatumma saniatigut killiliussat § 4, imm. 3-mi taaneqartut iluanni tunissuteqartoqarsinnaavoq.

§ 4. Inunnut ataasiakkaanut Namminersorllerullutik Oqartussanut imaluunniit Namminersorlutik Oqartussanut immikkut pingaaruteqartunut imaluunniit pingaaruteqarsimasunut tunissutitut

ilassinninnermut aningaasartuuteqartoqarsinnaavoq. Tunissutit taamaattut akunnaatsuni inuuissiornermut atasumik, tassa 50-inik, 60-inik, 70-inik, 80-inik, 90-inik aamma 100-nik ukioqalersunut, ukiut 25-nngortorsiorlugit, 40-nngortorsiorlugit imaluunniit 50-inngortorsiorlugit atorfeqarnermi nalliuottorsiortunut, katinnermi, ukiut 25-nngortorsiorlugit aamma ukiut 50-inngortorsiorlugit katiffisiornermi aamma toqusoqarnerani tunniunneqarsinnaapput. Pisuni ataasiakkaani immikkut tamani tunissutinut pisumi pineqartumi pisarnernut naleqquttutut isigineqartumik aningaasartuuteqartoqarsinnaavoq. Taamaattoq pisuni taamaattuni ataasiakkaani aningaasartuutit 1.200 kr.-it sinnerneqassanngillat.

Imm. 2. Inatsisartunut ilaasortat 60-iliillutik aamma 70-iliillutik inuuissiornerinut kiisalu inatsisartunut ilaasortap inatsisartunut ilaasortaanerminik ukiunik 25-iliineranut atatillugu, taamatuttaaq Hans Egedep Illuani ilassinnitoqarsinnaavoq Inatsisartunut Naalakkersuisunullu ilaasortanit, kiisalu inatsisartunut ilaasortap pineqartup aappaanit meeraanillu peqataaffigineqartumik aningaasatigut killiussat 10.000 kr.-it tikillugit iluanni. Aaqqissuussinermut atatillugu angalanernut aningaasartuuteqartoqarsinnaanngilaq.

Imm. 3. Pisuni allani imm. 1-imik taaneqartut saniatigut ilassinninnermut tunissuteqarnikkut inunnut ataasiakkaanut imaluunniit allanut immikkut qujassuteqarfigisariaqarlutik nersortarialinnik suliaqarsimasunut aningaasartuuteqartoqarsinnaavoq. Tunissutit taamaattut tassaasinnaapput soorlu naasut aamma atuakkat il.il. Taamaaliornermi aningaasartuutit pinerit tamaasa 500 kr.-it sinnissanngilaat.

Imm. 4. Suliffeqarfinnut, matumani aamma ilanngullugit Namminersorlutik Oqartussat ataani suliffeqarfinnut, suliffinnut, peqatigiiffinnut imaluunniit kattuffinnut Kalaallit Nunaanni angerlarsimaffeqartunut imaluunniit Kalaallit Nunaannut immikkut pingaarutilinnut ilassinninnernut aningaasartuutinik atuinikkut tunissuteqartoqarsinnaavoq. Tamanna suliffeqarfiup il.il. pineqartup nalliuottorsiirluni aaqqissuussinerani imaluunniit ukiumoortumik nalliuottorsiornerni imaluunniit allamik immikkut ittumik pissuteqarluni aaqqissuussinerani pisinnaavoq. Pisuni taamaattuni ataasiakkaani aningaasartuutit 5.000 kr.-it tikillugit atorneqarsinnaapput.

Imm. 5. Aaqqissuussinerni pisortatigoortumik Namminersorlutik Oqartussat avataannit sinniisut, ministeritut, inatsisartunut siulittaasuattut imaluunniit qaffasinnerusumik inissisimasut peqataaffigisaanni, imm. 1-imik kiisalu 3-4-mi pisuni taaneqartut qaangerlugit aamma aalajangersakkani aningaasat amerlassusissaat qaangerlugit tunissutinut aningaasartuutit atorneqarsinnaapput.

Imm. 6. Tunissuteqarnissamut aningaasartuuteqarnissamik nassataqartussamik pilersaaruteqartoqarpal, pisuni ataasiakkaani imm. 1 kiisalu 3-4-mi taaneqartumik aningaasartaliussat qaangerlugit imaluunniit pisuni allani, aalajangersakkani taaneqartut avataaniittunut tunissuteqartoqarnissaanik pilersaaruteqartoqarpal, taamaaliornissamut Siuttaasoqarfimmit tamanna sioqullugu akuersissummik pissarsisoqqaassaaq. Akuersissut aningaasartuutaasut naatsorsuutinut nalunaarsuinermi upternarsaammut ilanngullugu kakkiunneqassaaq.

Imm. 7. Inatsisartut Allattoqarfiata suliffeqarfinni sulisorisanut, suliffimmit soraarnermut atatillugu imaluunniit immikkut ittumik pissuteqarluni sulisorisanut tunissutit, ilassinninnermi aningaasartuutit isigineqassanngillat sulisoqarnermulli aningaasartuutit isigineqassallutik.

§ 5. Inatsisartut aaqqissugaannik isummersoqatigiissitsinernut, isumasioqatigiinnernut, tusarniaanernut assigisaannulluunniit aningaasartuutit ilassinninnertut isigineqarneq ajorput. Tamanna aamma atuuppoq Inatsisartut ataatsimiinnerisa nalaanni nalinginnaasumik sutugassaqartinneqarnermut, taakkununnga ilanngullugit siulittaasutut atuunnerminut atatillugu Siulittaasup Inatsisartuni ataatsimeeqateqarnerinut sutugassanut aningaasartuutit.

Imm. 2. Inatsisartuni atorfilinnut aappaannullu aningaasartuutit ilassinninnermut aningaasartuutit isigineqaratik sulisoqarnermut aningaasartuutit isigineqassapput Inatsisartullu Allattoqarfiata kontuanut kontulerneqassallutik.

Imm. 3. Aaqquissuussinerni aningaasartuutit agguarnissaat aalajangerneqarsinnaanngippata, aningaasartuutit missiliorlugit agguarneqarsinnaapput.

§ 6. Atortunut ussassaarutitut pissusilinnut Inatsisartut Namminersorlutik Oqartussalluunniit taaguutaanik ilisarnaataanilluunniit naqinnilerlugin immikkut suliarinneqartunut aningaasartuutit ilai annikinnerusut, aningaasartuutinut upernarsaatit naatsorsuutinut ilanngunneqartussanut piumasaqaatit, siunertamut, peqataasunut il.il. tunngasut, ilassinninnermut aningaasartuuteqarnermi piumasaqaataasartut naammassingikkaluarlugit aammalu 200 kr.-it sinnernagit nalillit Inatsisartut ilassinninnermut kontuanit akilerneqarsinnaapput.

§ 7. Piffissami Inatsisartunut qinersisoqarnissaanik nalunaaruteqarnerup qinersinerullu ingerlanneqarnissaata akornanni ilassinninnermut aningaasartuuteqartoqarsinnaavoq aatsaat Inatsisartut Siulittaasoqarfiannit isumaqtigisummit aalajangersimasumik siumullu akuerineqareernikkut.

Kapitali 2

Angalanermi aamma najugaqarnermi aningaasartuutit

§ 8. Aningaasarsiaqartitaaneq pillugu inatsit naapertorlugu Inatsisartut Siulittaasuata Inatsisartut Siulittaasuattut angalanerinut aningaasartuutit matussuserneqartartussaapput. Nerisaqarneq aamma najugaqarneq akiligassiisoqarnera malillugu akilerneqassapput kingornalu malitsigisaanik Nunatta Karsianut akilertinneqarlutik. Inatsisartut Siulittaasuata akiligassiisarluni angalanissani kissaatigingippagu, taarsiullugu malittarisassat Inatsisartunut ilaasortanut allanut atuuttut malillugit ullormusiaqartitsisoqassaaq.

Imm. 2. Angalanernut akunnittarfinnnullu aningaasartuutit taamaallaat matussuserneqarsinnaapput sulinermut atatillugu aningaasartuutaagunik. Aningaasartuutaanerusut assersuutigalugu uninnganerup sivitsorneqarneranik, illoqarfiup angerlarsimaffigisap aqquaarneqarneranik allatulluunniit toqqaannartumik aqqutaasinaasumik saneqqutsinermik pissuteqartut sulinermullu atatinneqarsinnaanngitsut matussuserneqarsinnaanngillat. Tamanna aamma atuuppoq ornitami angallanneqarnernut sulinermut tunnganngitsunut.

Imm. 3. Qimuttuitsut timmisartullu atorlugit angalanerni nalunaaquattap akunnerinit pingasunit sivisunerusuni 1. klasse imaluunniit assigisaa atorneqarsinnaavoq. Akunnittarfinni unnuinerni juniorsuite, superior room assigisaaluunniit, ullaakkorsiorneq ilanngullugu unnuinermut ataatsimut annerpaamik 1.900 kr.-inik akeqarsinnaasoq, atorneqarsinnaavoq. Sapinngisamik akunnittarfiit naalagaaffimmut isumaqtigisummut ilaasut atorniarneqartassapput.

Imm. 4. Inatsisartunut Siulittaasoq aamma Inatsisartut Allattoqarfiani atorfillit angalanermi ataatsimut angallassisumik atugaqarpata, peqataasullu tamaasa immikkoortillugit qanoq akiliuteqarnissaanik akiligassamik suliaqartoqarani, peqataasut amerlassusaat naapertorlugin aningaasartuutinut akiligassaq agguarneqassaaq. Aningaasartuutit ilai, Inatsisartunut Siulittaasumut tunngatinneqartut, Inatsisartut kontuannit akilerneqassapput, aningaasartuutilu peqataasunut allanut tunngasut, Inatsisartut Allattoqarfiata kontuannit akilerneqarlutik. Ataatsimulli taxanit angallanneqarnermut aningaasartuutit Inatsisartut kontuanit akilerneqassapput.

Imm. 5. Nerisaqarnermut aningaasartuuteqartoqartillugu ullup qeqqasiornermut aningaasartuutit 300. kr.-init unnukkorsiornermullu aningaasartuutit 400 kr.-init amerlaneroqqusaanngillat. Ullup unnuallu ataatsip ingerlanerani aningaasartuutit tamarmiusut 800 kr.-init amerlaneroqqusaanngillat.

Angalanerit pinerit tamaasa qaangiunneranni tamakkiisumik naatsorsuusiortoqartassaaq akiliutissallu inaarutaasut isumannaarneqarlutik. Siusinnerusukkut akiliutissanik inaarutaasumik isumannaarnermi aningaasartuutaasut aningaasartutissatut killiliussanit annikinnerunerat naatsorsuusiornermi sunniuteqassanngilaq.

Imm. 6. Inatsisartut Allattoqarfiani atorfilik, atorfeqarnermut atatillugu angalaqataasoq Inatsisartunut Siulittaasup nerisaata assinganik nereqataappat, aalajangersagaq imm. 5-imiittooq assingusumik atuutsinneqassaaq. Pisuni taamaattuni aningaasartutigineqartut ilai, atorfilimmut tunngatinneqarsinnaasut Inatsisartut Allattoqarfia kontuanit akilerneqassapput. Qummut killiliussatut aalajangersakkat sipporlugit aningaasartuutaajunnartut atorfillip nammineq akilissavai. Atorfilinnut atatillugu aammattaaq ullormusiassat ilanngaaffigineqassapput, imaattoqarp, matuma malitsigisaanik atorfeqarnermut atatillugu angalanermi amerlanerusunik aningaasartuuteqarnermi ajunngitsorsiassat pillugit maleruagassat nalinginnaasut tamatumunnga tunngasut malillugit.

Imm. 7. Inatsisartut Siulittaasuanut atisanik pisinermut aningaasartuuteqartoqarsinnaanngilaq. Taamaattorli pisortatigoortumik aaqqissuussinerni peqataanermi, nalliuttorsiornermi atisat immikkut ittut atorneqartussaatillugit, nalliuttorsiornermi atisanik attartornermut aningaasartuuteqartoqarsinnaavoq.

§ 9. Aningaasarsiaqartitaaneq pillugu inatsit naapertorlugu Inatsisartunut Siulittaasuata pisuni immikkut ittuni aapparisani imaluunniit inooqatigisani Inatsisartut Siulittaasuattut angalanermi peqatigisinnaavaa. Taamaaliorsinnaaneq aatsaat atorneqassaaq Namminersorlutik Oqartussat avataanniit pisortatigoortumik sinniisup, soorlu ministerip, inatsisartunut siulittaasuatuut imaluunniit qaffasinnerusumik inisisimasup peqataasup aapparisaa imaluunniit inooqatigisaa aaqqissuussinernut atasumik peqataappat. Aalajangersakkat § 8, imm. 1 - 5 aamma imm. 7, aammattaaq aapparisamut imaluunniit inooqatigisamut angalaqataasumut assingusumik atuupput.

Imm. 2. Aapparisap imaluunniit inooqatigisap atorfeqarnermut atasumik angalanermi peqatiginissaannut imm. 1-imi taaneqartunik allaanerusunik pissutissaqarp, taamaaliornissaq sioqqullugu Inatsisartut Suleriaatsimut Ataatsimiitaliaannit akuersissummik pissarsisoqaqqaassaaq. Aningaasartuutit naatsorsuutinut nalunaarsorneqarneranni aningaasartuutinut uppernarsaatitut allagartamut akuersissut kakkiunneqassaaq.

§ 10. Nunanit allanit nunaniluunniit allani pisortatigut tikeraartoqartillugu, Nersornaammik tunisisoqartillugu imaluunniit qaffasinnerusumik pisortatigut aaqqissusoqartillugu, angalanermut, ineqarnermut il.il. Inatsisartut Siulittaasoqarfianiinngitsunik Inatsisartulluunniit Allattoqarfianiinngitsunik aappaasunillu aningaasartutissat pisariaqartinneqarpata, aningaasartuutit taamatut ittut Inatsisartut Suleriaatsimut Ataatsimiitaliaata aalajangereratigut ilassinninnertut aningaasartuutaasinnaapput.

Kapitali 3 *Akeqanngitsumik ajunngitsorsiat*

§ 11. Inatsisartut Siulittaasuannut atorfeqarnermi biileqartinneqassaaq aalajangersimasumik ingerlatsisoqanngitsumik.

Imm. 2. Inatsisartut Siulittaasuata atorfeqarnermi biileqartinneqarnermut taarsiullugu Nuummi angallanneqarnermut taxanik atortarnissaq toqqarpagu ukiumoortumik najukkami angallanneqarnermut tapisiaqartitsisoqassaaq akeqanngitsumik biileqartinneqarnerup akileraartarnikkut naleqartinneqarneranut naapertuutumik; taanna ullumikkut 60.000 kr.-iuvoq. Inatsisartut Siulittaasuut ukioq tamaat siulittaasuusimanngippat najukkami angallanneqarnermut tapisiaq qaammatit tamaasa pineqartup siulittaasuuffigisaasa aallartinneri tamaasa najukkami

angallanneqarnermut tapisiap aqqaneq marlunngorlugu aggorneranik ataatsimik annertussuseqassaaq. Najukkami angallanneqarnermut tapisiaq Inatsisartut Allattoqarfiannit akileraartarnermik oqartussanut nalunaarutigineqassaaq.

Imm. 3. Nuummi taxanit angallanneqarnermut aningaasartuutit utertinneqarsinnaanngillat. Inatsisartut Siulittaasuat atorfeqarnermi biileqartinneqarpat, taamaattoq sulinermut atatillugu nereqatigiinnernut, ilassinninnernut taamaaqataanullu aaqqissuussinernut imigassallerfiusunut peqataanernut atatillugu Nuummi taxanit angallanneqarnermut aningaasartuutit utertinneqarsinnaassapput. Utertinneqarsinnaanissaannut piumasaqaataavoq taamatut angallanneqarnermut aalajangersimasumik pissutaasup taxarnermut uppermarsaammut nalunaarneqarsimanissa.

Imm. 4. Inatsisartut Siulittaasuannut atorfeqarnermut atatillugu biileritinneqartoq pissarsiarineqarnermini annerpaamik 250.000 kr.-inik akeqarsinnaavoq. Atorfeqarnermut atatillugu biili siusinnerpaamik ukiut arfinillit ingerlareerpata taarserneqarsinnaavoq.

§ 12. Inatsisartut Siulittaasuat akeqanngitsumik atorfeqarnermut atatillugu angallattakkamik oqarasuaateqartinneqarlunilu angerlarsimaffimmini aalajangersimasumik ikkuffilimmik oqarasuaateqartinneqarsinnaatitaavoq.

Imm. 2. Aaqqissuussineq Inatsisartut Allattoqarfinnit akileraartarnermik oqartussaasunut nalunaarutigineqassaaq.

§ 13. Inatsisartut Siulittaasuat angerlarsimaffimmini akeqanngitsumik aalajangersimasumik attavilimmik qarasaasiaqartinneqassaaq, angallattakkamik qarasaasiaqartinneqassalluni naqiterissuteqartinneqassallunilu.

Imm. 2. Inatsisartut Siulittaasuat angerlarsimaffimmini qarasaasiemiit akeqanngitsumik internettimik atuisinnaatitaavoq.

Imm. 3. Aaqqissuussineq Inatsisartut Allattoqarfiannit akileraartarnermik oqartussanut nalunaarutigineqassaaq.

§ 14. Inatsisartut Siulittaasuat aningaaserivinnit allagartanik akiliutaasartunik korteqartinneqarsinnaavoq. Allagartaq sulinermut atatillugu taamaallaat atorneqarsinnaavoq. Allagartaq suliamut atatinngagu atorneqartillugu atorunnaarsinneqartassaaq.

§ 15. Inatsisartut Siulittaasuat, Inatsisartunut ilaasortat allat assigalugit, sulinermut atatillugu angalanernut atatillugu ajoqusernerit matussuserneqartarnissaannik Namminersorlutik Oqartussat sillimmasersimanerannut ilaatinneqarpoq. Ajoqusernerit sillimmasersimanermit matussuserneqarsinnaanngitsut Nunatta Karsiata susassarinngilai.

§ 16. Inatsisartut Siulittaasuat atorfimmut atasumik, maleruagassat aningaasarsiaqartitaanermut inatsimmi aalajangersakkat naapertorlugit, ineqartinneqassaaq. Aaqqissuussineq Inatsisartut Allattoqarfinnit akileraartarnermik oqartussaasunut nalunaarutigineqassaaq.

Imm. 2. Inatsisartut Siulittaasuata pequsersukkamik ineqartinneqarnissaq kissaatigippagu, Inatsisartunit pequsersuineq isumagineqassaaq. Tamatumunnga aningaasartuutaasussat Inatsisartut Suleriaatsimut Ataatsimiitaliaanit akuerineqaqqaartassapput. Pequitit il.il. pisiarineqartut Inatsisartut Allattoqarfiannit pigisat allattorsimaffianni nalunaarsorneqassapput.

Imm. 3. Pequsersukkamik inigisaqartitsisoqarpat, pigisat inummut tunngalluinnartut nutsernermi pigisat assartorneqarnerannut il.il. aningaasartuutit tunngassuteqartut taamaallaat akilerneqassapput, Namminersorlutik Oqartussani atorfillit pequsersukkamik ineqartinneqartut pineqarnerat assigalugu.

Imm. 4. Imermut, kiassarnermut innaallagissamullu atukkamut kiisalu aputaajaanermut aningaasartuutit Nunatta Karsianit matussuserneqartassapput. Tamanna aamma atuuppoq qaammatit affakkaarlugit marloriarluni eqqiaanermut, pinerit tamaasa 8 tiiminik sivisussusilimmuit imaluunniit sisamariarluni pinerit tamaasa 4 tiiminik sivisussusilimmuit aammalu aasaanerani igalaat qaammatikkutaartumik salinnerinut aningaasartuutinut. Atorfimmut atasumik inigisamut aningaasartuutit allat Nunatta Karsianit matussuserneqarsinnaanngillat.

§ 17. §§ 11-16-imi taaneqartut saniatigut Inatsisartut Siulittaasuat allanik akeqanngitsunik ajunngitsorsiaqartinneqarsinnaanngilaq.

Kapitali 4

Aningaasaliissutit killissaat aamma akuersissuteqartarneq il.il.

§ 18. Inatsisartut Siulittaasuat ukiumut ilassinninnermut 400.000 kr.-it tikillugit aningaasartuuteqarsinnaavoq. Inatsisartunut Siulittaasuusoq ukioq tamaat Inatsisartunut Siulittaasuusimanngippat, ilassinninnermut aningaasat atugassat 400.000 kr.-inik 1/12-ii qaammatit aallartinneranni tamani annertussuseqassapput, pineqartup Inatsisartunut siulittaasuunerani.

§ 19. Inatsisartunut Siulittaasuata Siulittaasoqarfiullu suliaqarnermut atatillugu angalasarnerinut aningaasartuutit killissaannik Inatsisartut Suleriaatsimut Ataatsimiititaliaat aalajangersaassaaq.

§ 20. Inatsisartunut Siulittaasoq, Nunatta Karsiata akiligaanik ilassinninnermut aningaasartuutinik atuisoq, naatsorsuutinut atugassani uppernarsaatinut ataasiakkaanut aningaasartuutinik atuinerup siunertaa allassavaa, aamma inuit peqataasut kikkuuneri ataasiakkaarlugit imaluunniit eqimattanngorlugit ilanngullugit allassavai.

Imm. 2. Ilassinninnermut aningaasartuutinut uppernarsaatit Inatsisartunut Siulittaasumit atsiorneqassapput.

Imm. 3. Imm. 2 naapertorlugu atsiornermigut Inatsisartut Siulittaasuat uppernarsaassaaq, aningaasartuutit ilassinninnermut tunngasut, aamma aningaasartuutinut akiliuteqarneq aningaasaliissutinit matusissutissaqartut.

§ 21. Maleruaqqusanik ukunani aalajangersakkat malinneqarnissaannut, matumani aningaasaliissutit killiussat malinneqarnissaat pineqartumut tunngatillugu ilassinninnermut aamma angalanermut aningaasaliissutinut tunngasut ilanngullugit Inatsisartut Siulittaasuat akisussaavoq.

Imm. 2. Inatsisartut Allattoqarfiata aningaasartuutinut allanut tunngasut Inatsisartut ilassinninnermut kontuanit akilerneqartartut pillugit suliassanik naatsorsuutinullu nalunaarsuineq kiisalu missingersuutinut naleqqiussisarluni malinnaaneq isumagissavavaa.

Imm. 3. Maleruaqqusanik ukunani saneqqunneqanngikkunik, Namminersorlutik Oqartussani naatsorsuserinermut aalajangersakkat qaqgumulluunniit atuuttut aamma Inatsisartut Siulittaasuata ilassinninnermut, angalanernut uninnganermullu aningaasartuutigisartagaanut atuupput. Taamaattumik aamma aalajangersakkat taamaattut maleruaqqusamut matumunnga ilanngullugit malinneqassapput.

§ 22. Aningaasartuut maleruaqqusat uku naapertorlugit Nunatta Karsianit akilerneqartussaanngikkaangat, aningaasartuut Inatsisartut Siulittaasuanit imaluunniit Inatsisartut Siulittaasoqarfianni ilaasortamit siulittaasoq sinnerlugu aningaasartuuteqarnermut akisussaasimasumit namminermit akilerneqassaaq, taamaattoq § 8, imm. 6 takuuk.

Imm. 2. Imm. 1 naapertorlugu akiligassanngortut aningaasarsiaasanit ilanngaatigineqarsinnaapput.

*Imm. 3. § 8, imm. 6 naapertorlugu akiligassanngortut sulisup akissarsiaanit
ilanngaatigineqarsinnaapput.*

Kapitali 5
Tunissutisineq

§ 23. Tunissutit, Inatsisartut Siulittaasuata siulittaasutut tunissutisiai, Inatsisartut pigisassaraat Inatsisartullu Allattoqarfiannit nalunaarsorneqassallutik. Tamatumani pineqanngillat tunissutit 500 kr. inorlugu naleqassasutut nalilerneqartut, kiisalu tunissutit namminermut atatillugu atugassatut naatsorsuussat.

Kapitali 6
Kikkut tamat paasitinneqarsinnaatitaanerat

§ 24. Maleruaqqusat uku naapertorlugit aningaasartuutinut uppernarsaatit kikkunnit tamanit takuneqarsinnaapput.


Kapitali 7
Atuutilernera

§ 25. Malittareqqusat uku ulloq 10. april 2017 atuutilerput.

Inatsisartut Allattoqarfiat, ulloq 12. april 2017


Lars-Emil Johansen .

/


Ellen Kolby Chemnitz